

ԱՎԵՏԻՍ ՀԱՐՈՒԹՅՈՒՆՅԱՆ

պատմական գիտ. թեկնածու

ԿՈՏՈՐԱԾՆԵՐԻ ԻՐԱԿԱՆԱՅՄԱՆ ՆԱԽԱԳԱՏՐԱՍՏԱԿԱՆ ՓՈԻԼԸ ՎԱՆ-ՎԱՍԴՈՒՐԱԿԱՆՈՒՄ ՄԵԾ ԵՂԵՌՆԻ ՆԱԽՕՐՅԱԿԻՆ

Դասալքության եւ զինաթափման խնդիրը. Թուրքական կառավարությունը Առաջին աշխարհամարտի սկզբից եւեթ տենդորեն նախապատրաստվեց կենսագործելու հայերի բնաջնջման դիվային ծրագիրը՝ դասալքության եւ զինաթափման գործում ցույց տալով չափազանց մեծ եռանդ:

Զինվորագրության հետեւանքով հայ երիտասարդության մեծագույն մասը թեւեւ ենթարկվել էր հաշվառման, բայց զանազան պատճառներով դեռ բանակ չէր գորակոչվել: Ուսուցիչները, կրթական գործը չխափանելու համար ժամանակավորապես զերծ էին մնացել գորակոչից, ստացել էին ժամանակավոր «վեխիքաներ» (ազատության թուղթ) եւ դարձել էին քաղաքապահներ, պայմանով, որ շաբաթը երեք անգամ ներկայանան Վանի կառավարչատուն: Արհեստավորները գորանոցներում բանակի համար հագուստներ էին կարում, հոգում էին այլ կարիքներ եւ Վանից դեռ չէին հեռացել: Մեծահարուստներից ոմանք զինվորական փրկանք վճարելով, ազատության թուղթ էին ստացել, իսկ որոշ զինվորացուներ թաքնվել էին:

Զորահավաքը եւ թուրքական բանակի կենտրոնացումն ընթանում էին ծանր պայմաններում, քանի որ ոչ ոք բանակ գնալ չէր ուզում: Բանակ գորակոչված առաջին զինվորներին բաժին հասած աղետը բավարար էր զգուշացնելու մնացած հայ երիտասարդներին՝ խուսափելու զինվորագրումից: Բացի այդ, գորակոչիկներին չէին ապահովում սնունդով, քանի որ հավաքագրման կետերում չկային պարենային պահեստներ, իսկ նորակոչիկների տեղավորումը տեղից-տեղ իրականացվում էր հետեւակ վիճակում՝ ժամում 3 կմ արագությամբ¹:

Միաժամանակ, թե՛ սեֆեր-բերլիկը (զորահավաքը) եւ թե՛ թեքեալիֆի-հարայինն (պատերազմական տուրքը) անողոք էին², իսկ դրանց կարգադրությունը հայերը համարում էին անիրավացի, քանի որ շատ տեղերում աշխատող ձեռքեր բոլորովին չէին մնում: Ոմանք, ելնելով իրենց ընտանիքների տնտեսական վատթար եւ անապահով վիճակից եւ տեղյակ լինելով բանա-

1 Տե՛ս Է. Փ. Լուշպեյր, Турция в годы первой мировой войны 1914-1918 гг., военно-политический очерк. М., 1966, էջ 50:

2 Այդ մասին ավելի հանգամանորեն տե՛ս Ա. Հարությունյան, Սեֆեր-բերլիկը, թեքեալիֆի հարայինն եւ դասալքության խնդիրը Վան-Վասպուրականում 1914-1915 թթ., Էջմիածին, 2011, Դ., էջ 29-46:

կում գտնվող քրիստոնյա զինվորների ահավոր դրությանը, խուսափում են զինվորական ծառայությունից եւ որոշում են գաղթել ու հեռանալ հայրենիքից:³ Այդ մասին բնութագրական է Օն. Մխիթարյանի գնահատականը. հայ չարքաշ գյուղացին կամ աշխատավոր զինվորը «թողած էր իր կալն ու հունձը եւ հրացանը առած կանգնած էր իր պարտականութեան գլուխը, բայց ահա, իր աչքի առջեւ, կը կողոպտուէր ու կը մոխրանար իր հայրենի գիւղը, կը կոտորուէին կամ վտարանդի կը դառնային իր հարազատները, կը զինաթափուէր եւ անհետ կը կորսուէր իր ընկերը եւ իր ցեղի գլխուն կը պատրաստուէր անագորոյն փոթորիկ մը՝ նիւթուած անոնց իսկ կողմէ, որոնց համար իր կեանքը գոհելու եկած էր ինքը»⁴:

Այդ պատճառով, հայ զորակոչիկները մի շարք տեղերում սկսեցին խուսափել զինվորական ծառայությունից, «որը հանդիսանում էր բնական հետեւանք օրէնք խախտող անարդար կարգադրութեան»⁵:

Դասալքության դիմելու իրավունք ուներ նաեւ արդեն թուրքական բանակ զորակոչված անհավասար, խտրական եւ ստորացուցիչ պայմաններում գտնվող հայ զինվորը: «Սկսուած զօրահանութիւնը,- նշվում է Վանի Առաջնորդարանի 1914թ. սեպտեմբերի 27-ի տեղեկագրում,- բնական էր, որ խրտչեցներ շատերը, մանաւանդ Հայերու պէս զինուորական կեանքի իսպառ անվարժ ժողովուրդը, ուստի բնական էր, որ ամենքը անմիջապէս չպատասխանեցին զօրակոչին կամ զինուորագրուելէն յետոյ դասալիքներ գտնուէին»⁶:

Ուստի, շատերը քաշվում էին ասպարեզից, խուսափում զինվորական ծառայությունից եւ թաքնվում: Խույս էին տալիս ոչ միայն քրիստոնյաները, այլեւ մահմեդականները:

Դասալքությունը սկսվեց գլխավորապէս ճանապարհների եւ խրամատների վրա աշխատողների շարքերում, ուր հայ զինվորը ֆիզիկական զրկանքների հետ միաժամանակ, կրում էր նաեւ բարոյական տառապանք:

Այդուհանդերձ, զենք կրող հայ զինվորները, մինչեւ Կովկասյան ռազմաճակատում ռազմական գործողությունների սկիզբը շատ քիչ դասալիքներ տվեցին: Սակայն այդ ամենի հիման վրա իշխանություններն առաջ քաշեցին դասալքության մասին շինծու հարցը:

Դասալքության «ծրագիրը» կենսագործելու պատեհ առիթ հանդիսացավ ռուսական զորամասերի մուտքը սահմանամերձ Սարայ գյուղաքաղաք, իսկ այնուհետեւ թուրքական բանակի պարտությունը Սարիղամիշի եւ Քյուրիքլոյի մոտ՝ 1914թ. նոյեմբեր-դեկտեմբերին: Բնականաբար, գտնվեցին դասալիքներ: Զինվորները «...ամբողջ խմբերով սկսեցին փախչել գործող բանակներից ու պահեստից եւ թաքնուել լեռներում ու գիւղերում»: Հակառակ

3 Տե՛ս «Մշակ», Թիֆլիս, 1914 մայիսի 18, թ. 106:

4 Օն. Մխիթարյան, Վանի հերոսամարտը, Սոֆիա, 1930, էջ 15:

5 Ա-Դո, Մեծ դէպքերը Վասպուրականում 1914-1915 թուականներին, Երեւան, 1917, էջ 70:

6 Զաւէն Արքեպս., Պատրիարքական Յուշերս. վատրագիրներ եւ վկայութիւններ, Գահիրեւ, 1947, էջ 52:

շփհաղին, «փախչում էին թե՛ հայերը, թե՛ քրդերը, թե՛ թուրքերը, բայց տոկոսային յարաբերությամբ՝ հինգ փախչող թուրքին՝ մի հայ հազիվ էր ընկնում»։ Իսկ այն տեղերում, որտեղ բանակում հայերը շատ չնչին տոկոս էին կազմում, «փախչողները բացառապես թուրքերն էին լինում եւ մեծ չափով»⁷ եւ «թերեւս քանի մը հարիւր» հայ զինվորներ⁸։ Իսկ «քիւրդ դասալիքները խմբերով կը վխտային լեռնային գաւառները»⁹։ Բերկրիում, Բայազետում եւ Սարայում կազմալուծման ենթարկեցին թուրքական կանոնավոր զորքերը։ Ճիշտ է նկատում Ա. Վռամյանը, երբ նշում է. «Երբ այսօր Ճիհատի կոչին կ'անսաստեն բուն իսկ իսլամները, փախուստ տալով պատերազմի դաշտէն, անիրաւութիւն մը եւ անարդարութիւն մըն է դասալիք անունը տալ հայ զինուորին, որուն կը զլացուի Էսկան ըստորոգելիքը իր պարտականութեան, որ գէնքն է»¹⁰։

Բանն այն է, որ Կովկասյան ճակատում թուրքական զորքերի ձախորդությունների պատասխանատվության մեծագույն մասը վերագրվում էր քրիստոնյաներին եւ մասնավորապես հայերին։ «Թրքական մամուլը, - նշում է Ռոնե Բինոնը, - սկսաւ Հայերու վրայ յարձակիլ, ամբաստանելով զանոնք դաւաճանութեան, լրտեսութեան եւ ըմբոստութեան մէջ։ ... Կամաց կամաց կը պատրաստէին հանրային կարծիքը այն տռամներուն, որոնք պիտի արիւնաներկէին Կայսրութիւնը»։ Մեքքերելով թուրքական «Քարապոզ» երգիծական պարբերականից տեղեկություն՝ նա ավելացնում է. «Հայերու դէմքը կացութեան չափանիշն է, երբ որ ուրախ է, ուրեմն Դաշնակիցներու գործերը լաւ ճամբու մէջ են, երբ մթազնաձ է, ուրեմն գէշ կ'ընթանան»։ («Եթէ կ'ուզէք գիտնալ թէ ինչ է պատերազմին ընթացքը, միայն Հայու մը երեսը նայեցէք։ Եթէ ան կը ժպտի, կը նշանակէ որ՝ Դաշնակիցները կը յաղթեն։ Եթէ երեսը ծուռ է, կը նշանակէ որ՝ Գերմանները կը յաջողին»)»¹¹։

Մինչդեռ թուրքերը հավատում էին, որ Վանի հայկական նահանգների հայ զինվորներից շատերը դասալիք էին դարձել, անցել էին սահմանագիծը, միացել էին ռուսական բանակին եւ ճանապարհներին ու ընդհանրապես երկրին իրենց ծանոթությունը կարելու ազդակ էր հանդիսացել ռուսական զորքերի հաղթանակների համար։

Մատների վրա կարելի էր հաշվել այն հայերին, որոնք գենք վերցնելով անցել էին ռուսական բանակի կողմը¹²։ Օրինակ, Բաշկալեի եւ Սարայի շրջաններում ռուսական բանակի կողմն անցած հայ զինվորների թիվը հարյուրից չէր անցնում, բայց սրի քաշվեցին մի շարք գյուղերի հայ բնակիչները։

7 **Արամյան**, Զարիւրելի ոճիրը. Մուշ-Մասուն. բեկորներ իմ յուշերից - Վան-Նիկոլը-Կարօն ու Մարօն, Բագու, 1916, էջ 1-2։

8 **Զ. Դադյան**, Արծիվ Վասպուրականի, Երեւան, 1965, էջ 252։

9 **Հ. Կոստան**, Վան-Քաղաքամիջի ապրիլեան կռիւները, Երեւան, 1992, էջ 15։

10 ՀԱԱ, ֆ. 227, գ. 416, թ. 54-58, նաեւ «Հայրենիք», Բոստոն, 1924, ապրիլ, թ. 6, էջ 98-100, նաեւ **Օն. Մխիթարեան**, Վանի հերոսամարտը, Սոֆիա, 1930, էջ 28-34։

11 Տե՛ս **Ռոնե Բինոն**, նշվ. աշխ., Կ.Պոլիս, 1919, էջ 20-21, նաեւ «Ամերիկեան դեսպան Մր. Մօրկընթաւի հիշատակները եւ հայկական եղեռնի զաղտնիքները», Կ.Պոլիս, 1919, էջ 245-246։

12 Տե՛ս ՀԱԱ, ֆ. 242, ց. 1, գ. 33, թթ. 27-34։

Այն, որ հայ դասալիքների թիվը շատ քիչ էր, վկայում են նույնիսկ Ռ. Բինոնը¹³, Հ. Բարբին¹⁴, Լ. Բրայսը¹⁵ եւ Հ. Մորգենթաունը¹⁶:

Այնուամենայնիվ, թուրքերը պարտության ամբողջ մեղքը սկսեցին բարդել հայերի վրա, իսկ թուրքահայ զինվորները, տեսնելով իրենց առաջ կանգնած ռուսական զորքերին եւ նրանց շարքերում կռվող հայ կամավորներին, «ձեռքը սկսեց անգործանալ, չը կրակել իր հարազատի վրա, ձգել զորքի շարքերը, յաճախ անցնել նաեւ ռուսական բանակը»¹⁷:

Ամեն անգամ դասալքության հարցը քաղաքական եւ քարոզչական նպատակներով օգտագործվում էր հայերի եւ ոչ թե դեպի թիկունք փախած թուրքական զինվորների դեմ, որոնք զբաղվում էին գանգվածային կոռուպտով եւ սպանություններով:

Կ. Պոլսի պատրիարքարանին ուղղված Բաղեշի առաջնորդարանի 1914 թ. հոկտեմբերի 13-ի թիվ 126 նամակը, հերքելով թուրքերի տարածած հեյոյուրանքները, գրում էր. «Սրբազանը մեր նամակին մեջ կը յիշէր նաեւ Վանէն 250-է աւելի հայ զինուորներու իրենց զենքերով Ռուսաստան անցնիլը: Առաջնորդարնս մանաւանդ այժմու կացութեան մէջ իր սահմանակից առաջնորդարաններու հետ շարունակ յարաբերութեան մէջ լինելով, ինչպէս որ է Վանը, ո՛չ պաշտոնական եւ ո՛չ անպաշտոն կերպով այս մասին ռեւէ տեղեկութիւն չունինք, եւ հետեւաբար այս լուրին ալ սխալ լինելը հաղորդեցինք Սրբազանին»¹⁸: Դրանք մասն էին կազմում այն 20000 արեւմտահայերի, որոնք պատերազմից շատ առաջ, կոտորածներից խույս տալու նպատակով, ապաստանել էին Կովկասում եւ չէին կարողացել վերադառնալ իրենց հայրենի օջախը՝ նրանց նկատմամբ սահմանադրական Թուրքիայի վարիչների բացարձակ թշնամական վերաբերմունքի հետեւանքով:

Իսկ Օսմանյան խորհրդարանի՝ Վանի երեսփոխան Ա. Վռամյանի՝ Թուրքիայի Ներքին գործերի նախարար Թալյաթին հղած 1915 թ. փետրվարի 14-ի ծածկագիր հեռագրի մեջ ապացուցվում էր, որ ռուսական բանակի մեջ պատերազմից առաջ Ռուսաստան անցած արեւմտահայերից ընդամենը 1000 մարդ կար, որից 200-300-ը՝ Վանից փախածներն էին¹⁹:

Սակայն, այդ ամենը կանխամտածված դրսեւորում չէր, այլ պատահական ու անհատական: Հայ դեկավար շրջանները ոչ միայն չէին խրախուսում այդ երեւույթը, այլեւ արեւմտահայերին թելադրում էին քաղաքացիական

13 Տէն Ռընէ Բինոն, Հայերու բնաջնջումը. գերմանական մշտոտ-թորակա գործելակերպ, էջ 20:

14 Տէն Հանոի Պառայի, Սարսափի երկրին մէջ. Նահատակ Հայաստան, Կ.Պոլիս, 1919, էջ 87:

15 Տէն Լօրտ Պրայս, Հայկական ջարդերու փաստաթղթերը, Ա. մաս, կազմեց Վահան Միրազեան, Կ.Պոլիս, 1920, էջ 104-105:

16 Տէն «Ամերիկեան դեսպան Մր. Մօրլընթաուի հիշատակները եւ հայկական եղեռնի գաղտնիքները», էջ 246:

17 Ա-Դ-Ո, Մեծ դէպքերը Վասպուրականում, էջ 86:

18 Զաւէն Արքեպս., Պատրիարքական Յուշերս. վաւերագիրներ եւ վկայութիւններ, էջ 69:

19 Անդ:

պարտքի անշեղ կատարումն էլ կոչ էին անում «հայ գիւղերուն հնազանդ մնալ եւ քրիստոնէաբար տանիլ չարչարանքի լուծը»²⁰:

Նույնիսկ Կովկասի փոխարքա, կոմս Վորոնցով-Դաշկովը հայոց Կաթողիկոս Գեորգ Ե.-ին ուղղված 1914 թ. սեպտեմբերի 2-ի թիվ 1569 իր նամակում էր նշում, որ «ծայրահեղ անցանկալի եւ նույնիսկ վտանգավոր է, ինչ-որ ապստամբություն առաջ բերել թուրքահայերի շրջանում»²¹:

Հայերի ղեկավար կազմը՝ առաջնորդներն ու դաշնակցական կոմիտեները, որոնք 1914թ. օգոստոսին ընդհանուր ժողով էին գումարել Էրզրումում, հրապարակավ հայտարարեցին Օսմանյան պետությանն իրենց հավատարմության մասին եւ քննության առնելով իրավիճակը՝ գտան, որ պետք է կռվել Օսմանյան Թուրքիայի պաշտպանության համար, եթե այն վճռի մասնակցել պատերազմին, հարազատորեն կատարել «այլասերման» հասած քաղաքացիական պարտքը հայրենիքի ու կառավարության հանդեպ եւ խրախուսել ժողովրդին՝ առանց դժգոհելու տալ հարկեր ու գորակոչիկներ:

Միաժամանակ, Վանի Ազգային Առաջնորդարանը, Օսմանյան խորհրդարանի երեսփոխան Ա.Վռամյանը, ինչպես նաեւ 1914թ. հոկտեմբերի 10-15-ը Վանում կազմված միջկուսակցական խառն խորհրդաժողովը, որը քաղաքային ժողովի հետ պիտի վարեր ազգային գործերը, յուրաքանչյուրն իր իրավասության եւ դիրքի մեջ համագործակից, ամեն կերպ «կը ջանային պահել յարաբերութիւնը կառավարութեան եւ ժողովրդի միջեւ» եւ «... ամէն հնարաւոր միջոց կիրառելով չձգտելու յարաբերութիւնները կառավարութեան եւ հայ ժողովրդի միջեւ»²²:

Վերսկսվեցին առժամանակ ընդհատված ժողովներն ու խորհրդակցությունները, որոնց համար հավաքավայր ընտրվեց Այգեստանի Նորաշեն թաղամասի Ս. Աստվածածին եկեղեցին: Այդ խորհրդակցություններին մասնակցում էին բոլոր դասակարգերի ներկայացուցիչները:

Որոշվեց կազմել պատվիրակություն՝ Ա. Թերզիբաշյանի եւ Գ. Չիտեշյանի գլխավորությամբ եւ համաձայնության եզրեր գտնել կառավարության հետ: Իր կողմից առանձին, որպես թուրքական խորհրդարանի անդամ, պիտի աշխատեր նաեւ Ա. Վռամյանը:

Սակայն, Ջեդեթի անդրդվելի էր: Նա «հաճոյքով կը լսէր Վռամեան Էֆէնտիի խելացի խորհուրդները եւ խնդրանքները, կը խոստանար օգտուիլ անոր թելադրութիւններէն», բայց ամեն անգամ տեսակցություններից հետո առաջարկում էր, որ «Վռամեան Էֆէնտին իր հեղինակաւոր ազդեցութիւնը ի գործ դնէ հայ դասալիքները իրենց պարտականութեան գլուխը բերելու համար»²³ եւ «զինուորացուները կը պահանջէր՝ առանց ամենադոյզն երաշխիքի»²⁴:

20 Օն. Մխիթարեան, Վանի հերոսամարտը, էջ 25:

21 Տեն ՀԱԱ, (Կոստաթիսի), ֆ. 4056, ց. 1, գ. 15, թ. 1:

22 Հ. Կոտայեան, Վան-Քաղաքամիջի Այրիկեան կռիւները, էջ 16:

23 Ա. Դարբինեան, Հայ ազատագրական շարժման օրերէն. Յուշեր 1890-էն 1940, Երեւան, 2003, էջ 158:

24 «Յուշեր Արմենակ Եկաբեանի», Գահիրէ, 1947, էջ 185:

Իրապետ Ա. Վռամեանն էլ, Արամն էլ շատ ջանք էին թափում, որ «չափով մը գոնէ գոհացում տային կառավարութեան պահանջին»²⁵:

Այն ժամանակ որոշվեց, որ զինվորների մի մասը գնա հանձնվի «որպես գիտակից ու կամաւոր զոհաբերութիւն»: Գոնէ կառավարութեան պահանջած 4000-ին փոխարէն 7-800 դասալիք ետ դարձնենք»²⁶: Եւ որպէսզի նրանք քաջալերվեն, որոշվեց, որ նրանց ընկերանան Ա. Թերզիբաշյանն ու ռամկավար Հ. Գոյումճյանը:

Սակայն, այս ամենը տեղի չունեցավ Բերդակի դեպքերի պատճառով:

Իր հերթին պատրիարքը, Ա. Վռամյանը եւ ուրիշներ շրջաբերական նամակով կոչ էին անում արեւմտահայերին, ինչպէս գավառներում, այնպէս էլ մայրաքաղաքում լինել շրջահայաց եւ զգույշ, օժանդակել, հավատարիմ մնալ եւ ենթարկվել թուրքական պետությանը եւ որպէս օսմանյան նվիրյալ հպատակ, «չխնայէ մինչեւ իսկ իր կեանքը, եթէ հայրենիքը պէտք ունի անոր»²⁷: Վանից եւ Էրզրումից ստացված պատասխան գրություններում հաստատում էին նրանց ցանկությունը: Վանի առաջնորդարանից ուղարկված պատասխան հեռագրում մասնավորապէս նշվում էր. «Հեռագիրնիդ ստացանք, ձեր հրահանգին համաձայն պէտք եղած յորդորները կարդացինք: Վանայ Հայուն մեր սիրեցեալ հայրենիքին հանդէպ ունեցած հաւատարմութիւնը եւ ըրած գոհողութիւնները հնուց ի վեր ապացուցուած են: Զօրակոչին եւ ներկայ պատերազմի ընթացքին եւս արդէն օսմ. գահուն յարգանքին եւ պարծանքին բարձրացմանը նիւթապէս, բարոյապէս եւ անձով ամէն տեսակ գոհողութիւններ ընելու վրայ ենք եւ ասկէ ետք ալ նոյն գոհողութիւններու պատրաստ ենք»²⁸:

Վանի եւ շրջանի հայությունը բնավ ապստամբելու նպատակ չի ունեցել եւ ոչ էլ առանձին պատրաստություն էր տեսել: Բանն այն է, որ Վանում տարիներ շարունակ գործունեություն ծավալած եւ, առաջին հայացքից, իրենցից կազմակերպված ուժ ներկայացնող հայ քաղաքական կուսակցությունների, մասնավորապէս դաշնակցության տեղական կազմակերպությունները ապստամբություն բարձրացնելու, թուրքական բանակին թիկունքից հարվածելու եւ ոչ մի գործնական մտադրություն չունեին:

Դաշնակցական ղեկավար գործիչների խոստովանությամբ, պատերազմի նախօրեին «Վանէն մինչեւ Կիլիկիա» ապստամբական «հոգեբանութիւնը գոյութիւն չունէր, այսպիսի ծրագիր մը գծուած չէր: Հայութիւնն ու Հ.Յ. Դաշնակցութիւնն այսպիսի ձեռնարկ մը գլուխ հանելու համար պատրաստուած չէին: Երկվութիւնը եւ տատանումը մնացին իրենց ուժին մէջ»²⁹:

25 Ա. Դարբինեան, Հայ ազատագրական շարժման օրերէն. Յուլի 1890-էն 1940, էջ 158:

26 Անդ:

27 Ս. Ակունի, Միլիոն մը հայերու ջարդի պատմութիւնը, էջ 16:

28 Անդ, էջ 17, Վասպուրական, Վան-Վասպուրականի Ապրիլեան Հերոսամարտի տասնեւհինգամեակին առթիւ, 1915-1930, Վենետիկ, 1930, էջ 21:

29 Կ. Սասունի, Տաճկահայաստանը Ռուսական տիրապետութեան տակ (1914-1918). Տաճկահայ գաղթաշարժը եւ անոնց դերը Հայաստանի Հանրապետութեան կազմութեան մէջ, Բոստոն, 1927, էջ 25-26:

Իրթիհատ-դաշնակցական համագործակցությունը, որ Սահմանադրությունից ի վեր շարունակվում էր մինչև պատերազմի նախօրյակը, «ամլացրել» էր այդ կուսակցությունը եւ դարձրել նախաձեռնությունից զուրկ, հասունացող իրադարձությունների ետեւից ընթացող մարդկանց խումբ:

Վասպուրականի ամբողջ հայությունը՝ Օսմանյան խորհրդարանի անդամ, հայտնի դաշնակցական Ա.Վռամյանի գլխավորությամբ, ոչ միայն դեմ էր ամենափոքր ապստամբական շարժում հրահրելուն, այլեւ «առանձին խոհեմությամբ եւ հեռատեսությամբ» գաղտնի պատվիրակներ էր ուղարկում Ս. Էջմիածին եւ Թիֆլիս՝ Հայոց Կաթողիկոսի եւ Ազգային բյուրոյի ներկայացուցիչների մոտ, որպեսզի վերջ տան կամավորական շարժմանը եւ «վերապահ ու խոհեմ ընթացք բռնեն եւ չգրգռեն ոճրագործ իրթիհատական ոճրածարավ թուրք կառավարութեան»³⁰:

Դաշնակցության ղեկավարները արեցին հնարավորը թափ առնող հայ կամավորականների շարժումը կասեցնելու համար, սակայն դա նրանց չհաջողվեց:

Ռուսական բանակի հարձակման հաջողության ժամանակ էլ Վանի հայկական հասարակական-քաղաքական ղեկավարների շրջանում հիմնականում իշխում էր թուրքական կառավարության հետ կապերը չիզելու, նրա դեմ ըմբոստացում թույլ չտալու տեսակետը, քանի դեռ ռուսական զորքերը չէին գրավել այդ վայրերը:

«...Թէեւ մթնոլորտը լեցուած էր խռովութիւններու կանխանշաններով, նկատուած է Հ. Մորգենթաուն, բայց Հայերը ինքնազսպողութեան հիմնալի ընթացքով շարժեցան... Հայ կղերը եւ քաղաքական պետերը... ժողովրդին մէջ մտան, նախազգուշացնելով հանդարտութիւն պահել, համբերատարօրէն հանդուրժել ամէն անարգանքի եւ նոյն իսկ ծայրայեղութիւններու, ատով չտալու համար Թիւրքերուն այն առիթը՝ գոր կը փնտռէին... Եթէ նոյն իսկ անոնք մեր մէկ քանի գիւղերը կրակի տան, կ'ըսէին այդ պետերը, փոխվրէժի մի' դիմէք, որովհետեւ աւելի լաւ է որ՝ մէկ քանի գիւղեր ոչնչանան, քան ամբողջ ազգը կոտորուի»³¹:

Երբ ռուսական բանակը, իր կազմում ունենալով Անդրանիկի խումբը, պատերազմի սկզբին գրավեց թուրք-պարսկական սահմանագլխի վրա՝ Վանից ոչ հեռու գտնվող Սարայ գյուղաքաղաքը, Վանում թուրքական իշխանությունները խուճապի մատնվեցին եւ պատրաստվեցին տեղափոխվել Բիթլիս: Այդ օրերին Վանում թուրքական ռազմական ուժ չկար, եթե չհաշվենք 400-ի հասնող ոստիկաններին եւ, ինչպես Արմենակ Եկարյանն է վկայում. «Մերիկները կրնային ամեն բան ընել անարգել»³²:

30 Գր. Ծ. վարդ. Պաղաքեան, Հայ գողգոթան. դրուագներ հայ մարտիրոսագրութենէն. Պետիկէն դէպի Զօր. 1914 1920, Ա. հատոր, Վիեննա, 1922, էջ 61: Յովհ. առ. քհ. Հանյան, Հայոց տաժանքի ճամբաներով, Ա. հատոր, Թեհրան, 1965, էջ 374-375:

31 «Ամերիկեան դեսպան Մր. Մօրլընթաուի հիշատակները եւ հայկական եղեռնի գաղտնիքները», էջ 246:

32 «Յուշեր Արմենակ Եկարեանի», էջ 186:

Սակայն,- շարունակում է Ա. Եկարյանը,- «Մեր վրա պարտականություն կծանրանար զգույշ կենալը, եթե քաղաքի մեջ եւ մերձակայքը մենք կրնայինք մեր ուզածը ընել, չէինք կրնար սակայն պաշտպանել գյուղական շրջանները՝ գուրկ ինքնապաշտպանության ամեն միջոցե, կղզիացած շատ տեղ, քրդական ծովու մեջ»³³:

Վանի ամերիկյան ուսումնական հաստատության միսիոներուհի միս Նեփին վկայում էր, որ հայ քաղաքական կուսակցությունների ներկայացուցիչները «ցոյց տուին գնահատելի խոհեմություն եւ իրենց տաքգլուխ երիտասարդութեանը խաղաղեցնելու համար... արգելեցին ընդհարումները եւ հրամայեցին գիւղացիներին լռութեամբ տանել ամեն բան: Խորհուրդ տուին հրկիզուած գիւղերի համար վրէժխնդիր չլինել, որպէսզի իրենց կողմից որեւէ փոխադարձութեամբ ընդհանուր շարդ առաջ չբերուէր»³⁴:

Այսպիսով, չնայած բոլոր դժվարություններին, հայերը կատարում էին իրենց քաղաքացիական պարտքը եւ փորձում էին խուսափել անախորժություններից ու աղետներից:

Սակայն, ինչպես Զ. Կիրակոսյանն է նկատում, «Վանում գործած ազգային կուսակցությունների մեղքը ոչ թե ապստամբական նախապատրաստությունն էր, այլ, ընդհակառակը, նրան պատրաստ չլինելը, նրանց աննպատակ ընթացքը, իրենց կոնկրետ ծրագիրն ու անելիքները չիմանալը, մոտալուտ գալիքի աղոտ պատկերացումը: Վերջին հաշվով նրանք անտեղյակ էին, թե վաղն ինչ է անելու կառավարությունը եւ դրան համապատասխան ինչպիսին պետք է լինի իրենց դիրքը: Նրանց այդ գործելակերպը, ակնկալությունները երիտթուրքական կառավարությունից փաստորեն շարունակվեցին մինչեւ Վանի վրա թուրքական հարձակումը»³⁵:

Սարայից ռուսների հետ քաշվելուց հետո, թուրքական կառավարությունն ավելի անգիջող դարձավ: Հայ երիտասարդությունը, տեղյակ լինելով բանակում քրիստոնյա հայ զինվորների ահավոր վիճակին, մերժում էր զինվորագրվել, իսկ կառավարությունը նրանցից պահանջում էր հանձնվել՝ առանց որեւէ պայմանի եւ առանց ապահովության որեւէ երաշխիքի:

Ավելին, կառավարությունը խստորեն հետապնդում էր հայ «դասալիքներ»-ին՝ կազմակերպելով շուրջկալներ եւ խուզարկություններ: Գյուղերում այդ գործը կատարում էին թուրք ոստիկան-զինվորները, որոնք ցուցակներով գյուղից գյուղ էին շրջում, բռնություններ գործադրում՝ պահանջելով հանձնել դասալիքներին: Միաժամանակ, խուզարկում էին տները՝ գնեք գտնելու նպատակով: Եթե դասալիքներին չէին գտնում, այրում էին նրանց տները եւ բռնագրավում արտերը:

33 Անդ:

34 «Մեծ պատերազմը եւ հայ ժողովուրդը», Կ. Պոլիս, 1920, էջ 47:

35 Զ. Կիրակոսյան, Առաջին համաշխարհային պատերազմը եւ արեւմտահայությունը, Երեւան, 1965, էջ 265:

Ժանդարմների շուրջկալները երբեմն հասցնում էին խռովությունների և զինված ընդհարումների հայերի և ժանդարմների միջև, որոնց աջակցում էին նաև քրդերը: 1914թ. դեկտեմբերից մինչև 1915թ. մարտ Վանի զանազան գավառների շուրջ 10 գյուղերում կազմակերպվեցին զինված դիմադրություններ, որոնք ավարտվեցին կամ հայերի փախուստով, կամ էլ «կարգ մը գիւղերու մէջ անխնայ սպանուեցան այր մարդիկ, կիները բռնաբարուեցան, գիւղերը կողոպտուեցան»³⁶:

Հայկական 30-40 գյուղերի ժողովուրդը տեղահան եղավ: Այսպես, գերմանական դիվանագիտական փաստաթղթերից մեկը հավաստում է, որ «մարտի սկզբին կոմիսար Ռազին բեյը և լեյտենանտ Ջեդեթ բեյը 40 զաբթիներով գալիս են հայկական Կրոնք գյուղը: Մի դասալիքի հետ փոխհրաձգության ժամանակ ժանդարմներից մեկի ձին սպանվում է: Սա վերադառնում է գյուղ, գյուղացիներից վերցնում է մի լավ ձի՝ որպես հատուցում սպանված ձիու դիմաց, ստիպում է իրեն վճարել 40 թուրքական ֆունտ, կրակին է տալիս 25 տուն, գյուղի տղամարդկանց ստիպում ցատկել թրի սայրի վրայով և բռնազրավում արտերը: Արտմանում թուրք հրոսակները տեղավորվում են հայերի տներում: Նրանց պարագլուխը, ի նշան շնորհակալության, բռնաբարում է իրեն հյուրընկալողի հարսին...»³⁷:

Ի դեպ, զանգվածային դասալքությանը կառավարությունը շատ անգամ մատների արանքով էր նայում: Հայ զինվորները սկսեցին փախչել նույնիսկ այն ժամանակ, երբ նրանց զինաթափ արին. և տարօրինակն այն էր, որ կառավարությունը միջոցներ ձեռք չէր առնում փախուստը դադարեցնելու համար: Օրինակ, Արճակի մէջ, երբ 15 և 16-րդ բանակների հայ զինվորներին զինաթափ արին, նրանցից շատերը փախան, սակայն տեղական կառավարությունը տեսնում էր ու լռում: «Տարօրինակ շիւ նայուածքով մը կառավարութիւնը, Վանի մէջ Ձեվտեթը, հայ տարրով էր որ կ'ուզէր զբաղուիլ, երբեք ուշադրութեան չառնելով դասալքութեան երեւոյթի բուն պատճառները»³⁸:

Ձեռնարկվեցին միտումնավոր այնպիսի քայլեր, որ քաջալերվեց դասալքությունը, սաստկացվեց միջցեղային ատելությունը, ակնհայտ անջրպետ ստեղծվեց մահմեդականների և քրիստոնյա հայերի միջև:

Իսկ քաղաքում կառավարությունը պարբերաբար հաշիվ էր պահանջում Հայոց առաջնորդարանից, Օսմանյան խորհրդարանի անդամ Ա. Վառնյանից և Հ.Յ.Դ. Վանի ներկայացուցիչներ Արամից և Իշխանից՝ առանց որեւէ պայմանի, առանց ապահովության և որեւէ խոստումի:

«... Ծեվտեթ պէյ,- նկատում է Ա. Դարբինյանը,- ամէն օր կը կրկնէր իր պահանջները:

36 Ա. Դարբինյան, Հայ ազատագրական շարժման օրերն. Յուլի 1890-էն 1940, էջ 157:

37 «Գերմանիան և Հայաստանը 1914-1918». դիվանագիտական փաստաթղթերի ժողովածու, հատ. II, հրատարակությունը և ներածությունը՝ դոկտոր Յոհաննես Լեփսիուսի, Երևան, 2008, էջ 300:

38 Հ. Կոստյան, նշվ աշխ., էջ 15:

-Կը պահանջեմ, որ դասալիքները գան յանձնուին:

-Ժամանակ տուէք, որ կարողանանք համոզել դասալիքները, - կը խնդրէին Վռամեան եւ Արամ:

Իրապէս Վռամեանն ալ, Արամն ալ շատ ջանք կը թափէին. որ «չափով մը գոնէ գոհացում տային կառավարութեան պահանջին»³⁹:

Արամն ու Իշխանն ամբողջովին կլանված էին ներքաղաքական խնդիրներով, իսկ Ա.Վռամյանը «կը ներկայանար կառավարութեան առաջ անխարդախ թարգման Վասպուրականի ամբողջ ցաւերուն, բողոքներուն, ո՛չ միայն թարգման, այլ պահպանող, յամառ հետապնդող»⁴⁰:

Ա. Վռամյանը Թալաթին ուղղված 1915 թ. փետրվարի 14-ի վերոհիշյալ ծածկագիր հեռագրում դասալքության համար առաջ էր քաշում երեք պատճառ՝ ա) 24 տարեկանից բարձր տարիք ունեցողների մարզված չլինելը, բ) 24 տարեկանից ցածր տարիք ունեցողների անկարողությունը դիմանալ հանկարծահաս պատերազմի ռազմական ծանր գրկանքներին՝ կապված ուտեստի եւ հագուստի հետ եւ գ) բանակում հայ զինվորների կրոնական խնդիրների անտեսումը եւ արհամարհումը: «Յետին չարագործն անգամ իր մահուան ժամուն իրաւունք ունի կրօնի սփոխանք պահանջելու եւ այդ չի զլացուիր անոր», - նշում էր Ա. Վռամյանը⁴¹:

Միաժամանակ նա հիմնավորելով դասալքության քաղաքական, ընկերային եւ կրոնական շարժառիթները՝ մասնավորապէս նշում էր. «Հայ դասալիքներու թիւը շատ սահմանափակ էր սկիզբները եւ անհնար չէր այդ աննշան տոկոսն ալ անհետացնել տակաւ... Ատոր հակառակը, աղէտաւոր ու դժբախտ անվստահութիւն մը կառավարութեան կողմէ հայերուն հանդէպ, հայ ժողովուրդի գոյութեան իսկ սպառնացող կազմակերպուած բնոյթ ունեցող կարգ մը դէպքեր, ճիհատի հռչակումը եւ անոր միակողմանի ըմբռնումը՝ եկան դասալքումի երեւոյթին տալու քաղաքական չարաշուք գոյն մը»⁴²:

Ըստ Ա. Վռամյանի դասալքության պատճառներն էին՝

ա) Հայ զինվորների եւ հայ ժանդարմների զինաթափումը, որն անմիջապէս ստեղծեց քաղաքական անվստահության հեղձուցիչ մթնոլորտ, նպաստեց միջցեղային հարաբերությունների լարվածությանը հայերի ու մահմեդականների միջեւ, բ) Զինաթափված հայ զինվորների օգտագործումը գրաստի փոխարեն, որը վիրավորեց նրանց մարդկային ու ազգային ինքնասիրությունը՝ ստորացնելով նրանց իրենց մահմեդական հայրենակիցների աչքին, գ) Զինաթափված հայերը, գտնվելով մահմեդական զինվորների հսկողության տակ, կամ հարկադրված լինելով անգեն շրջել բորբոքված եւ սպառնազինված մահմեդականների շրջանում, վտանգեցին իրենց կյանքը: Ահազանգեր կային

39 Ա. Դարբինեան, Հայ ազատագրական շարժման օրերէն. Յուշեր 1890-էն 1940, էջ 158:

40 Հ. Կոստյեան, նշվ. աշխ., էջ 17:

41 «Հայրենիք», Բոստոն, 1924, ապրիլ, թ. 6, էջ 98:

42 Անդ:

գնդակահար, ջրախեղդ կամ դաշունահար եղած եւ անհետ կորած հայ զինվորների մասին, Էրզրումի եւ Պարսկաստանի ռազմաճակատներում, դ) Տարբեր առիթներով զինաթափված հայ զինվորների հեռացումը իրենց գավառներից դեպի անձանոթ շրջաններ, ե) Բոլոր մահմեդականների՝ հատկապես 16 - 60 տարեկան բոլոր քրդերի անխափր զինումը միլիս անվան տակ եւ ոստիկանական-ժանդարմական պաշտոնների հանձնումը նրանց, որով նրանք ստացան տիրապետող ու զսպող ուժի իրավունք հայերի հանդեպ, գ) Միլիսների շահատակությունները, կատարված բռնություններն ու սպանությունները Թիմար գավառի հայկական Այուր, Խավենց, Ամյուկ, Գավաշի շրջանի՝ Բելու, Ընձաք, Նանիկանց եւ Կարճկանի՝ Եղեգիս գյուղերում Բաղեշի միլիսի ու չերքեզ սպայի ջոկատի կողմից, Մխկներ գյուղի բռնաբարությունները՝ Եոմեր աղայի միլիսների կողմից եւ Պարսկաստան գնալու ժամանակ Բշարե-Չաթոյի 600 հոգուց բաղկացած խմբի կատարած վայրագությունները Մանազկերտի շրջանում, Վանի նահանգի հյուսիս-արեւելյան շրջանի գյուղերում, Մշո դաշտում եւ Սիլվանի (Տիգրանակերտի) 12 հայկական գյուղերում, ե) Ծանոթ քուրդ ոճրագործների՝ Մեհմեդ Էմինի, Մուսա եւ Գասըմ բեյերի եւ շատ ուրիշների ներումն ու զինումը եւ նրանց՝ իրենց գյուղերում, կամ հայաբնակ շրջաններում մնալը, ը) Զինված քրդերի մեծ քանակով փախուստը բանակից եւ այդ դասալիքների կենտրոնացումը Վանի ու Բիթլիսի նահանգների լեռնային գավառներում, թ) Համիդիների մնալը հայաբնակ գավառներում ու նրանց կատարած ավերն ու թալանը Հասան-Թամրանում, Ախոռիկում, Պողասքեսենում, Հազարայում, Մանտանում, Պատիկ գյուղում՝ Սատըմ բեկի ջոկատի կողմից, եւ ժ) Վերջապես Բաշկալեի, նրա շրջակա հայկական գյուղերի, ինչպես նաեւ եւ Ախոռիկի, Ավգարիկի, Հասան-Թամրանի, Հազարենի ու Դաշ-Օղլուի ջարդերը⁴³:

Վերոհիշյալ 10 պատճառները ժողովրդին մղում են պատվի, կյանքի եւ ինչքի ապահովությանը, մի ժողովրդի, որի հանդեպ հռչակվել էր անհավատարմություն եւ անվստահություն՝ էլ ավելի ծանրացնելով նրանց կացությունը հարեւան քրդերի շրջանում: Ա. Վռամյանը կյանքի, պատվի եւ գույքի ապահովության խնդիրը համարում է բնական եւ նվիրական իրավունք եւ մատնանշում, որ կառավարությունը բանականությանը, խղճին եւ առողջ քաղաքականությանը հակառակ կգործի, եթե հայերին պարտադրի անգն զինվորական ծառայություն, քանի որ այն կսպառնա նրանց կյանքին, իսկ նրանց անպաշտպան ընտանիքներն ամեն վայրկյան ենթակա կլինեն զինված եւ կիսավայրենի քրդերի «արիւնոտ քմահաճոյքներուն»:

Ըստ Ա. Վռամյանի՝ գորակոչից խուսափելը տրամաբանական էր, քանի որ ա) հայերից հավաքած զինվորներին չէին զինում, այլ օգտագործում էին դիրքերը փորելու, պարենը շալակով փոխադրելու գործում, բ) մեծ չափերի

43 «Հայրենիք», Բոստոն, 1924, ապրիլ, թ. 6, էջ 98-99:

հարկեր էին հավաքում հայերից եւ գ) շատ հաճախ հայերին բանտարկում ու գնդակահարում էին:

Ա. Վռամյանը փորձում է բացատրել, որ եթե հակառակ ջիհադի կոչին՝ պատերազմից խուսափում էին նույնիսկ մահմեդականները, անիրավություն եւ անարդարություն էր դասալիք անունը տալ հայ զինվորին, «որուն կը գլացուի էական ստորոգելիքը իր պարտականութեան, որ զենքն է»⁴⁴:

Հաշվի առնելով հայերի դասալքման ընկերային, կրոնական եւ քաղաքական պատճառները, տնտեսական հետեւանքները, հայկական օջախներին սպառնացող վտանգը եւ ավազակությունները՝ Ա. Վռամյանը խոհեմաբար Զեդեթին առաջարկում էր. 1) Զենքի տակ զինվորական ծառայության մեջ պահել բոլոր այն հայերին, որոնք զինվորական պատրաստվածություն էին ստացել 1910-1914թթ., 2) Մինչեւ հայերի եւ կառավարության միջեւ վերավստահության հաստատումը, հայ զինվորներին իրենց գավառներում եւ նահանգներում օգտագործել ժանդարմների պաշտոնում, 3) 24 տարեկանից բարձր՝ զինվորական ծառայություն չանցած զինակոչիկներին ազատել բանակից եւ նրանցից վերցնել միայն չափավոր պատերազմական փրկանք⁴⁵:

Սակայն նրա հեռագիրը մնաց անպատասխան:

Կացությունն իրապես ծանր էր, քանի որ Արամն ու Ա. Վռամյանն առաջին անգամ էին տեսնում այն անջրպետը, «որ կը բաժներ հռետորական ամպիոնը իրականութենէն: Վռամեան, երբ Ամերիկա կը գտնուէր ու կը լսէր Երկրէն հասնող նկարագրութիւնները այս ու այն տեղ եղած ջարդերու մասին, կրակ ու բոց կը տեղացնէր Համիտի հասցէին, նախատինքներ ու տարափ կը թափէր «ստրկամիտ» հայերու գլխուն վրայ. որոնք չէին միանար իրենց՝ սուլթանական գազանութիւնները սանձելու: Սակայն այսօր Վռամեան Պոսթոնի մէջ չէ, այլ «յեղափոխականացած» Վանի մէջ, ուր ի՛նքն է, որ «կը ստրկանայ» եւ խոհեմութիւն կը քարոզէ...»⁴⁶:

Ա. Վռամյանի «աննկուն եւ մեթոտիկ աշխատանքներով ու յարաբերական գործերով» աչքի ընկնող դիվանագիտական այս գործունեությունը, որ տեւեց մինչեւ 1915թ. ապրիլի 3-ը, եւ որի արդյունքում բացահայտվեցին ջեդեթյան սադրանքներն ու դավերը, տարբեր կերպ է գնահատվել կուսակցական պատմագրության մեջ: Դաշնակցական պատմագրությունը, բարձր գնահատելով անվեհեր երեսփոխանի թափած ջանքերը, նրա գործունեության ամբողջական գնահատումը թողել է ապագային, «այն ատեն միայն, երբ լոյս կ'ընծայուին իր յիշատակագրերը, հեռագրերը, պահանջագրերը, օր օրին ունեցած յուշատերի արձանագրութիւնները»⁴⁷:

44 Անդ:

45 Տե՛ս ՀԱԱ, ֆ. 227, գ. 416, թ. 54-58, նաեւ «Հայրենիք», Բոստոն, 1924, ապրիլ, թ. 6, էջ 100, նաեւ Օն. Մխիթարեան, Վանի հերոսամարտը, էջ 28-34:

46 Ա. Դարբինյան, նշվ. աշխ., էջ 158:

47 Հ. Կոստյեան, նշվ. աշխ., էջ 15:

Իսկ ռամկավարները հեզմանքով այն կոչել են «խոհեմ» եւ «ողբացեալ» Վռամյանի «նրբամիտ դիւանագիտութիւն»⁴⁸:

Դասալքությունից հետո, հայ ժողովուրդը հայտարարվեց դավաճան, եւ հայ զինվորներին սկսեցին զանգվածաբար զինաթափ անել: Ահա «այն երեւոյթը, որ եկաւ վերջնականապէս քակելու հանգոյցը, սկիզբը դնելու այն հալածանքներուն, որոնք յանգելու էին հայ ժողովրդի տարեգրութեան մէջ նմանը չունեցող ջարդերին ու տեղահանութեանը»⁴⁹:

Այսպէս, Բերկրիում զինաթափ արեցին չորս, Արճակում՝ 15 եւ 16-րդ, իսկ Խոշաբում՝ 17 եւ 18-րդ թաբուրների զինվորներին, որոնք հիշյալ թափուրներում կազմում էին բավականին մեծ տոկոս: Այս ձեւով զինաթափ արվեցին նաեւ մյուս գորամասերի հազարավոր հայ զինվորներ:

Զինաթափ անելուց հետո թուրք զինվորները եւ ընդհանրապէս յուրաքանչյուր մահմեդական իրեն իրավունք էր վերապահում նախատել, հայիռյել, ծաղրի առարկա դարձնել հայ զինվորներին: Չէ՞ որ նա կառավարության վստահությունն էր կորցրել եւ դարձել էր խոցելի:

Զինաթափ անելուց հետո հայերից կազմեցին, այսպէս կոչված, «ամալիա թաբուրներ» կամ բանվորների գումարտակներ: Նրանց աշխատեցնում էին ճանապարհների վրա՝ կարգի բերելու ուղիները, քշում էին դիրքերը՝ հարկադրելով խրամատներ փորել կամ ստիպում էին գրաստի դեր ստանձնել՝ մեջքի վրա կրելով գորքի պաշարը: Մի խոսքով, նրանց կատարել էին տալիս բոլոր այն ծանր աշխատանքները, ինչ որ պահանջվում էր պատերազմի ու թուրքական բանակի համար:

Զինաթափ անելուց հետո փոխվեց նաեւ «ամալիա թաբուրների» հայ զինվորների ապրելակերպը: Նրանք զրկվեցին հագուստ ստանալուց եւ, որպէս բնակարաններ, նրանց հատկացվեցին գոմերն ու հարդանոցներն՝ առանց անկողիների ու վերմակների: Հայ զինվորներին տալիս էին միմիայն հաց, այն էլ ոչ կանոնավոր կերպով: Հաճախ հացի փոխարեն տալիս էին ալյուր, որից հայ զինվորը պիտի խմոր պատրաստեր եւ հաց պիտի թխեր: Սակայն վառելիք ու թոնիր չկար: Կատարել ամբողջ օրը ծանր աշխատանք, չունենալ հանգստի տեղ, հագուստ, եւ օրն անցկացնել դատարկ ստամոքսով՝ հեշտ չէր:

Ռուսական զորքերի՝ թուրքական հող մտնելուց հետո հայ զինվորների նկատմամբ կատարված այս դեպքերը թեթեւ չարիքներ էին, շուտով տեղի ունեցան մեծ չարիքներ, որոնք նվիրագործվեցին քիհաթի հայտարարումով: Թուրք միլիի զինվորները, որոնք ուղեկցում էին զինաթափված հայ զինվորներին, մասնավոր եւ գաղտնի հրաման ստացան կոտորելու նրանց: Թե՛ զենքի տակ եւ թե՛ աշխատանքների մեջ այս ու այն տեղ, այս ու այն պարագաներում, հայ զինվորներին սկսեցին գնդակահար անել ու սպանել: Դրանով

48 Ա.Դարբինյան, նշվ. աշխ., էջ 157:

49 Ա.Դո, Մեծ դեպքերը Վասպուրականում 1914-1915 թականներին, էջ 96:

սկսվում են հայ զինվորների անհատական և խմբակային սպանությունները՝ Օսմանյան կայսրության խուլ անկյուններում⁵⁰: Այս ոճիրը, որը գնալով ծավալվեց ու ընդհանրացավ, կատարվում էր երբեմն բացարձակ և երբեմն էլ խմբական ձեռով: Քրդերն ուղղակի զինվորական ճամբարներում էին կոտորում հայ զինվորներին:

Օրինակ, 1914թ. դեկտեմբերի սկզբին Քեուփրի-Քեոյի մօտ տեղի ունեցած ճակատամարտից հետո, երբ թուրքական զորքերը պարտություն կրելով փախուստի դիմեցին, Եղան գյուղում պատսպարվեցին 50 հայ զինվոր: Չնայած այն բանին, որ փախուստի էին դիմել նաեւ շատ թուրք զինվորներ, բայց կարգադրություն եղավ, եւ գնդակահարվեցին միայն հայերը: Այս խմբակային սպանությունը, որը կատարվեց մեկ վիրավոր հայ սպայի ներկայությամբ, տեղի ունեցավ առանց դատավարության եւ առանց մեղադրանքի:

Այսպիսի խմբական սպանություններ կատարվեցին նաեւ Խոշաբի եւ Արճակի շրջաններում⁵¹, իսկ հատ-հատ սպանություններ կատարվում էին ամեն օր եւ ամեն տեղ, առանց առիթի: Թե այս երեւոյթն ինչպիսի ծավալ ստացավ, երեւում է հետեւյալ փաստից:

Պարսկական սահմանի մոտ գտնվող Կոթուր ավանի թուրքական զինվորական հիվանդանոցի հայ բժիշկ Պողոս Փալտբեքյանը դեկտեմբերի վերջին շարժուն ժանդարմական գնդի հրամանատար Քյազիմ բեյից ստացավ մի նամակ, որտեղ նշվում էր, որ «ճամբարների վրայ քիւրդերը յարձակում են հայ զինուորների վրայ եւ սպանում են նրանց, ուստի հայ զինուորներին առանց տաճիկ զինուորների ընկերակցութեան ճամբայ մի հանէք, ես ափսոսում եմ հայերին, նրանք հաւատարիմ, ընդունակ եւ օգտակար տարր են, թէւ նրանց մէջ վատ մարդիկ էլ կան»⁵²:

Խոսքը տուն ուղարկվող վիրավոր հայ զինվորների մասին էր: Թուրք զինվորականն, իր բարեկամ հայ բժշկին այս նամակը գրելով, անշուշտ, արձագանք էր տվել իր ներքին ձայնին:

Նույն հայ բժիշկը Կոթուրից Վան գալու ճանապարհին տեսել էր, թե ինչպես զինաթափ արած զինվորներին տանջում էին ուժերից վեր ծանրոցներ բեռնել տալով, անգթորեն ծեծում էին փայտերով եւ օրերով թողնում էին քաղցած: Նա տեսել էր ճանապարհին այնպիսի դեպքեր, որ պատմելիս, ինչպես վկայում էին ականատեսները, չէր կարողանում զսպել արցունքը:

Այսպիսով, կուսակցությունների եւ Կ. Պոլսի պատրիարքարանի «խոհեմության» կարգախոսը կատարելապես ապակողմնորոշեց արեւմտահայությանը, թուլացրեց նրա զգաստությունն ու մարտական ոգին, որից օգտվեցին երիտթուրքերը եւ հանուն «խոհեմության», դասալքության պատրվակով զի-

50 Ընդհանուր առմամբ Մեծ Եղեռնի տարիներին ոչնչացվեց ավելի քան 60 հազ. հայ զինվոր. Ա. Համբարյան, Սո. Ստեփանյան, Հայոց ցեղասպանությունը, Երևան, 1995, էջ 15:

51 «Հայրենիք», Բոստոն, 1924, ապրիլ, թ. 6, էջ 91:

52 Ա.Ղո, նշվ. աշխ., էջ 101:

նաթափ արեցին վասպուրականի գորակոչիկներին ու քստմնելի ձեռով կոտորեցին:

Հալածանքներ Վասպուրականի հայ պաշտոնյաների դեմ. Առաջին աշխարհամարտի Կովկասյան ռազմաճակատում ռազմական գործողությունների սկզբից եւեթ Օսմանյան կառավարությունը Վասպուրականի հայերի նկատմամբ սկսեց պետական մի հալածանք, որն արտահայտվում էր զանազան առիթներով:

1914 թ. օգոստոսի երկրորդ կեսից հալածանքներ սկսվեցին Վասպուրականի հայ պաշտոնյաների դեմ, որը ծնեց անվստահության եւ կասկածի մի նոր առիթ: Հայ պաշտոնյաները, որոնց թիվը մեծ չէր, եւ որոնք շատ չնչին տոկոս էին կազմում Վանի հայաբնակ շրջաններում եւ պետական համակարգում, պաշտոններ ստանձնելու իրավունք էին ստացել միայն 1908 թ. սահմանադրությունից հետո: Առանց պատճառաբանությունների՝ նրանք ոչ միայն ազատվեցին իրենց զբաղեցրած պաշտոններից եւ հեռացվեցին ասպարեզից, այլեւ ենթարկվեցին խիստ հալածանքների:

Սկզբում պաշտոններից հեռացվեցին պատասխանատու հայ գայմագամները, որոնց ներկայությունը կարող էր այս կամ այն ազդեցությունն ունենալ ժողովրդի վրա: Այսպես, առանց որեւէ հիմնավորման պաշտոնանկ արվեց Վանի վիլայեթի Ալշավազ գավառի գայմագամ Պետրոս բեյը, եւ նրա տեղը նշանակվեց Նաջի բեյ վանեցին:

Սակայն պաշտոնագուրկ էին արվում նաեւ այնպիսիները, որոնք համարյա ազդեցություն չունեին կառավարության գործունեության ընթացքի վրա: Այսպես, կառավարությունը Վանի 3 հայ ոստիկանների՝ Պողոս Տեր Պողոսյանին, Շահեն Փրթոյանին եւ Արմենակ Շատախցյանին, առաջարկեց տեղափոխվել Մոսկու, որոնցից առաջին երկուսը համաձայնեցին⁵³: Սակայն, կառավարությունը դրանով չբավարարվեց, իր վերաբերմունքն արտահայտեց նաեւ նոր պաշտոնյաներ նշանակելու գործում:

Դրա համար կառավարությունը, ամրապնդելով իր դիրքերը տեղերում, կարելու էր պաշտոնների առաջ քաշեց կատաղի հայատյացների: Այդպես, 1914 թ. սեպտեմբերին Վանի կուսակալ նշանակվեց արյունարբու Զեդեթ բեյը⁵⁴, իսկ Վանի նախկին կուսակալ կրթված, «հաշտասեր» եւ արդարամիտ Թահսին բեյը նշանակվեց Էրզրումի կուսակալ⁵⁵: Ավանցի ճանապարհին կազմակերպված ողջերթի ժամանակ, որին ներկա էին պետական պաշտոնյաներ, ազգային ներկայացուցիչներ, երեսփոխան Ա. Վռամյանին եւ ուրիշների,

53 Ա-Ղ, նշվ. աշխ., էջ 76:

54 Տե՛ս ՀԱԱ, ֆ. 421, ց. 4, գ. 20, թ. 29:

55 Թահսին փաշան թուրքական պաշտոնատարներից ամենալուսավորված դեմքերից մեկն էր: Նրա օրոք «Քաղաքին լաւագոյն մապին մէջ բնակուող հայերուն եւ իսլամ թաղերու տղմուտ հիւղակներուն մէջ բնակուող թիւրքերուն եւ քիւրտերուն միջեւ գոյութիւն ունեցող յարաբերութիւնները տանելի կերպով գոհացուցիչ եղած են բազմաթիւ տարիներու ընթացքին». «Ամերիկեան դեսպան Մր. Մորգենթաուի յիշատակները...», էջ 244:

Թահսին բեյը, շնորհակալություն հայտնելով Վանի հայերի գորակոչին գործուն մասնակցություն ցուցաբերելու առումով, նշեց. «Ցատկ կը բաժնուիմ ձեզմէ եւ այս երկրէն, որու վերաշինման, ժողովուրդներու բարի դրացիութեան եւ յառաջդիմութեան ջերմ փափաքող մ'էի: Կերթամ, բայց ձեզ հետ պիտի լինիմ, մանաւանդ որ իմ յաջորդս Զեվտէթ պէյ, ահա որ հոս է (ցոյց տալով), թէւ երիտասարդ, բայց անպայման վստահ եմ իրեն թէ պիտի շարունակէ այն գործերն եւ աշխատանքները, գոր կ'իսաւ թողուցի... Մնաք բարով, հայրենակիցներ»⁵⁶:

Այդ մասին Հ. Կոստյանը հիշում է. «Մեկնող կուսակալի խօսքերը, թէ Զեվտէթը իրեն յաջորդն է, ճնշող տպաւորութիւն թողուց բոլորիս վրայ: Բնական նախագգացում մը կը խօսէր մեր սրտերուն, թէ կացութեան սա փափուկ եւ անստոյգ վիճակին մէջ, սեւ մը պիտի բերէ այս երկրին: Կը գգայինք, թէ Զեվտէթը ոճրագործ մ'է, անկէ բարիք, խելօք վարչականութիւն սպասելն անմտութիւն է: Չէ՞ որ զինք պատանի հասակէն կը ճանչնայինք»⁵⁷:

Զեւդէթը Վանի 1898-1906 թթ. կառավարիչ, երբեմնի կուսակալ ալբանացի Թահիր փաշայի որդին էր եւ Էնվեր փաշայի քեռայրը: Այդ էր պատճառը, որ հայ իրականության մեջ կային մարդիկ, որոնք բարձր էին գնահատում նրա անցյալը: Այսպէս, Ա. Դարբինյանը նշում է, որ «Այս ճեվտէթ պէյը գաւակն էր ալպանացի Թահիր փաշային, որ ինը տարի խաղաղութեամբ կառավարած էր Վանի նահանգը: Իր հօրը ազդեցութեան տակ ճեվտէթ երիտասարդ տարիքէն բարեկամական վերաբերում ունէր դէպի հայերը: Ինչպէս ասկէ առաջ յիշած եմ. Վարդգէսին բանտին մէջ այցելութեան կու գար: «Ազնիւ, յեղափոխական է», - ըսած էր ինձ Վարդգէս անոր մասին»⁵⁸: Սակայն, նա աչքի էր ընկնում իր հարափոփոխ նկարագրով. «Պահ մը բարեացակամ ոչ-Իսլամներուն հանդէպ, յաջորդ պահուն թշնամական, կեղծաւոր, դաւող եւ վայրագ, համաձայն իր ցեղին յոռեգոյն աւանդութիւններուն: Ան կ'ատէր Հայերը, եւ սրտովին համակիր էր հայկական խնդիրը լուծելու համար կազմակերպուած վաղեմի թրքական ծրագիրին»⁵⁹:

1906-1908 թթ. Վանի կուսակալ Ալի բեյի օրոք (որը դաժան քաղաքականություն էր վարում հայերի նկատմամբ եւ որը Բաթումում սպանվեց մի հայի ձեռքով) Զեւդէթը եղել էր Սարայի գայմագամը, սահմանադրությունից հետո Բաշկալէի մութեսարիֆը, իսկ 1914 թ. վերջին՝ Վան-Վասպուրականի նահանգապետ-կուսակալը՝ վալին, իրականում՝ «ի սրիկա դէմք»⁶⁰:

Դեռ պատերազմից առաջ նա աչքի էր ընկել իր թունոտ ատելությամբ ու

56 Հ. Կոստյան, Վան-Բաղաբամիջի Ապրիլեան կոիւները, էջ 9:

57 Անդ:

58 Ա. Դարբինյան, նշվ. աշխ., էջ 156:

59 «Ամերիկեան դեսպան Մր. Մօրլընթաուի Յիշատակները եւ հայկական Եղեռնին զաղտնիքները», էջ 247:

60 Ա.Դո, նշվ. աշխ., էջ 76:

ոճրագործությամբ հայերի նկատմամբ: Նա էր, որ հայերին տանջում էր ամենաբարբարոսական ձեւերով: Դավոյի՝ 1908 թ. դավաճանության ժամանակ Սարայ գավառի գայմագամ Զեդեթը, Աբաղայի Խաչան գյուղում առեւտրով զբաղվող վանեցի Պետրոս Փիրումյանին բռնելով որպես հեղափոխականի, ենթարկում է դաժան տանջանքների, իսկ վերջում երկու կատու է գցում նրա վարտիքը, կատուներին ծեծում, որոնք էլ ծվատում են Պետրոսին, որը հաջորդ օրը մահանում է: Ամբողջ երկրում Զեդեթը հայտնի էր որպես «բաշկալեցի պայտառ», քանի որ խոշտանգումների այդ գիտակը, Հ. Մորգենթաուի բնորոշմամբ, «հայտնագործել էր այն, ինչն, անշուշտ, գլուխգործոց էր, այն ամենից լավագույնը, ինչ հայտնի էր նախկինում. հենց նա էր ձիու պայտերը մեխում իր հայ զոհերի «ոտնաթաթերին»⁶¹: «Դավոյի գործով» նա 12 տարեկան մի հայ տղայի՝ Սարգսին, ծեծում է, պայտում եւ տանջամահ անելով՝ ստիպում, որ նա ցույց տա զենքի պահեստները: Այստեղից էլ նրա «Նալբանդ գայմագամ» կամ «Ղասաբ Թափուրի» մականունը: Զեդեթի մասին Ա. Մանդելշտամը հիշում է. «Հենց նորին գերազանցությանն (խոսքը Զեդեթի մասին է - Ավ. Հ.) է պատկանում խոշտանգումների երկու ձեւի գյուտի պատիվը, դրանցից մեկը հայերի ներբանները պայտելն է, ինչպես գրաստներին, նորություն, որի համար նրա գյուտարարն արժանացել է «բաշկալեցի պայտար» մականվան, մյուսը կատուներով խոշտանգելն էր, որի դեպքում կատուներ էին խցկում խոշտանգվողների հագուստի տակ եւ ապա ծեծում կենդանիներին, որ նրանց ստիպեն իրենց ատամներն ու ճանկերը խրել զոհի փորտափքը»⁶²:

Ա. Կեորկիզյանը նկատում է, որ «այդ հոգեբանությունն եւ չարագուշակ համարումը ուներ վանեցին Զեվտեթի անձին նկարագրին ու հակումին նկատմամբ: Դա արդիւնք էր տարիներու ընթացքին Վանի կուսակալութեան այս կամ այն գաւառին մէջ անոր կատարած այն բարբարոս քստմնելի եղեռնագործութեանց, զորս պարբերաբար նրբացած ու կատարելագործուած, երեւան բերած ու գործադրած էր Ոստանի, Բերկրիի, Ապաղայի, Նորտուգի եւ վերջէն ալ Պաշգալէի մէջ: Մարդիկ կենդանի պայտել, անլուր չարչարանքով մահացել, շամփրել ու ամորձիքները տրորելով սպաննել՝ սիրելի էին իր բնագոյին, հրճուանք՝ իր հոգու: Ոճիրներու սիրահար հրէշ մըն էր Զեվտեթը, գազան եւ անսիրտ: Ահռելի հակասութիւն իր վայելուչ արտաքինի եւ թաթար առնաւուտ ներքինի միջեւ: Վանեցիք ամենայն իրաւամբ գայն կը ճանչնային «նալպանտ միւթսարիֆ»: Վանի մամուլն անգամ հրապարակով այդ սեւ տիտղոսը տուաւ անոր դեռ երկու տարի առաջ, երբ Պաշգալէի մէջ միւթսարիֆութեան պաշտօն ուներ:

Ահա թէ ինչու Վասպուրականի հայութիւնը առանձնապէս գէշ նախագ-

61 «Հայերի ցեղասպանությունը Օսմանյան կայսրությունում», փաստաթղթերի եւ նյութերի ժողովածու Մ.Գ. Ներսիսյանի խմբագրությամբ, Երևան, 1991, էջ 685:

62 Անդ, էջ 597-598, նաև A. Mandelstam, Le sort de l'Empire Ottoman, Lausanne-Paris, 1917, էջ 248-278:

գացումով լեցուեցաւ, երբ Զեվթետը ստանձնեց կուսակալութեան պաշտօնը այդ ծանր օրերուն»⁶³:

Նա բարբարոս բնավորության տեր անձնավորություն էր: «Անիկա ոճիրներու սիրահար հրեշ մըն էր պարգասէս, գազան ու անսիրտ»⁶⁴:

Այժմ այդ Զեւդեթն առաջ էր քաշվում նահանգապետ-կուսակալի պաշտոնի, այն էլ հայաշատ Վանում, որպէսզի սրախողխող աներ անմեղ բնակչությանը: Ըստ Հ. Մորգենթաուի՝ կասկած չէր հարուցում, որ Զեւդեթը, որն իր կյանքի մեծ մասը անց էր կացրել Վանում, Վան էր եկել հայերին բնաջնջելու հրահանգով: «Այս կարգադրութիւնը, - գրում է Հ. Մորգենթաուն, - ինքնին շատ վրդովիչ էր: Թիւրք պաշտօնէութեան մէջ միշտ գտնուած է փոքրամասնութիւն մը մարդոց, որոնք հաւատացած չեն թէ՝ ջարդը պետական քաղաքականութիւն մըն է, եւ որոնց կարելի չէ վստահիլ որ ճշդապահօրէն կը կատարեն կեդրոնի Կառավարութեան ամենէն արիւնքուշտ հրահանգները: Հետեւաբար, ամէն անգամ որ ջարդեր ծրագրուած են, սովորութիւն եղած է նախ տեղափոխել այդ կարգի «անվստահելի» պաշտօնեաները եւ անոնց տեղը դնել աւելի վստահելի նկատուած անձեր»⁶⁵:

Սկզբում Զեւդեթը բացակայում էր Վանից, քանի որ Կովկասյան ճակատում ստանալով Պարսկաստանի սահմանագլխի թուրքական զինված ուժերի կրկնակի տիտղոսներ՝ կռվում էր ռուսների դէմ: Մականյն 1915թ. գարնանը ռուսների նահանջից հետո փորձեց իրագործել իր հայաջինջ ծրագիրը:

Վանեցին նկատել էր, որ Զեւդեթը փոխել էր իր վերաբերմունքը հայերի նկատմամբ: «Եթէ այդ սկզբին հոգեբանական տպաւորութիւն մ'էր, նախագացում, յետոյ անմիջական արգասիք էր արդէն պետական եւ ջեվտէթեան ռէժիմին, որ այլեւս մերկապարանոց փաստ էր, թէ Վասպուրականի մէջ հայութիւնը իր կատարած բոլոր գոհաբերութիւններով կը նկատուի անվստահելի եւ վնասակար»⁶⁶ :

Թուրք զինվորականությունը, տոգորված իթթիհատական շովինիզմով եւ «Էնվերյան երազներով», գորահավաքի ժամանակ ստեղծել էր խայտաբղետ, այլազան ու անկիրթ մի զինվորականություն, որի մեծ մասը կենտրոնացել էր պատերազմական ռազմաբեմում, իսկ մյուս մասը՝ «միլիս» անունով, դեռ մնում էր գավառներում:

Վասպուրականի հայերի զանգվածային կոտորածներն ու տեղահանությունները եւ բանակ կանչված հայ զինվորների զինաթափումն ու խմբակային կոտորածները մեծ մասամբ կատարվում էին հենց այդ միլիսների զինվորների կողմից:

63 Հ. Կոստյան, նշվ. աշխ., էջ 9-10:

64 Վեր. Ա. Կեօրկիզեան, Վասպուրականի Հերոսամարտը, 1919 ապրիլ 7 – 1915 մայիս 7, Յոյս եւ լոյս, Պէյրոյթ, 1965, էջ 83:

65 «Ամերիկեան դեսպան Մր. Մօրլենթաուի Յիշատակները եւ հայկական Եղեռնին զաղտնիքները», էջ 246:

66 Հ. Կոստյան, նշվ. աշխ., էջ 13:

Թուրքական կառավարությունը միաժամանակ շարժման մեջ դրեց նաև Վանի վիլայեթի համիդեական գնդերը, որոնց հրամանատարն էր Աբդուլ Գա-տըր բեյը: Միաժամանակ հրամաններ ուղարկվեցին Նորդուզի, Շատախի, Գավաշի, Կարճկանի, Խիզանի, Մոկսի եւ Սպարկերտի քուրդ բեյերին, որ կազմակերպեն կառավարական զենքերով զինված քրդական խմբեր⁶⁷:

Զինված քրդերը եւ բաշիբոզուկ միլիսները, մնալով իրենց տեղում, կառա-վարական գաղտնի թելադրանքով սկսեցին սանձարձակ շահատակություն-ները եւ ահաբեկումները, որով հայերի համար ստեղծվեց իրական անապա-հով վիճակ:

Մեծ հոգածությամբ կազմակերպվեցին նախկինում իրենց «սխրագոր-ծություններով» եւ վայրագություններով աչքի ընկած չեթեական-ավագակա-յին խմբեր (քրդերից, չերքեզներից, լազերից եւ այլն), որպեսզի հեշտացվի հայերի բնաջնջման գործը, ինչպես նաև խռովություններ բարձրացվի Ռու-սաստանի սահմանամերձ շրջաններում: Պահեստի գորքերի շարքերից ընտ-րում էին ամենավարժ եւ աչքի ընկնող զինվորներին եւ նրանցից կազմում էին առանձին խմբեր, որոնց կոչումը լինելու էր՝ կատարել ամենահանդուգն ձեռնարկումները: Այդպես, երիտթուրքերի ներկայացուցիչ Նաջի բեյը, որը Կ. Պոլսից Էրզրում եկավ դաշնակցության ներկայացուցիչների հետ բանակցե-լու, Էրզրումի եւ Վանի գորքերի միջից ընտրեց 3000 լավագույն զինվորներ եւ այդ հրոսակախմբի գլուխ անցած՝ շարժվեց դեպի Պարսկաստան՝ ռուսների դեմ խռովություններ եւ հարձակումներ կազմակերպելու համար⁶⁸: Իսկ Քյա-զիմ բեյը Սեյար եւ Սապըթթ խորակազմ գորաբաժիններով անցավ Սարայ եւ Բաշկալե:

Հայերին կոտորելու համար թուրքական կառավարությունը բանտերից ազատեց եւ ներում շնորհեց ավագակ եւ մարդասպան քուրդ եւ թուրք քրեա-կան հանցագործներին, գողերին ու ավագակներին, «իսկ շատ շատեր, որոնք իբրեւ փախստական կը հետապնդուէին, իջան լեռներէն եւ ընդունուեցան գրկաբաց»⁶⁹: Նրանք մտան միլիսների մեջ, եւ նրանցից կազմեցին ոստիկա-նական հրոսակախմբեր: Դրանցից մեկը (մոտ 600 հոգի) Վանում գլխավորում էր քուրդ ցեղապետ Բշարե Չաթոն, որը հարձակումներ էր գործում հայկա-կան շրջանների վրա, կոտորում ու կողոպտում էր մարդկանց, բռնաբարում կանանց: Այդպես, նա հասնելով Արճեշի շրջանի Հասպըսինակ գյուղը, որ-տեղ ժողովուրդը նրան տրամադրում է բնակարան, վառելիք եւ ուտեստ: Նա տեղավորվում է հայ ընտանիքներից մեկում, կերուխում անում եւ վերջում էլ պահանջում, որ տանտերը՝ Սեդրակն իր կնոջը իրեն տրամադրի: Տանտերը, իհարկե, չի համաձայնում, բայց դա շատ ծանր է նստում նրա վրա, ընդհուպ մինչեւ շիկացած շամփուրներով ձեռքերն ու դեմքը դաղելը:

67 Տե՛ս անդ:

68 Տե՛ս Ա-Դո, նշվ. աշխ., էջ 80:

69 Տե՛ս Հ. Կոստյան, նշվ. աշխ., էջ 13-14:

Նմանատիպ գործողություններ է նա կատարում նաեւ Բերկրիի Գյուզակ, Գործոթ եւ Արճակի Տաղվերան գյուղերում: Այս ամենը վկայում էր, որ «նոր սանկցիա է ստանում հին բարբարոս թեժիմը, նւիրագործում է անցած օրերի բարբարոս գործողութիւնը»⁷⁰:

Հայերի կոտորածը կանխվում էր միայն այն չափով, որ չափով ռուսական բանակն իր առաջխաղացման ճանապարհին գրավում էր այս կամ այն հայկական բնակավայրը, շրջանը եւ այլն: Եւ ընդհակառակը, հայերի կոտորածը սաստկանում էր այն վայրերում, որտեղից ռուսական բանակը, պատերազմական հանգամանքների թելադրանքով, նահանջում էր, իսկ հայ բնակչությունը միշտ չէ, որ տեղյակ էր լինում այդ նահանջին եւ չէր հասցնում շարժվել նրա հետ միասին⁷¹:

Ջիհադի գործադրումը Վանում. Ինչպես Բիրթիսի եւ Էրզրումի, նույնպես եւ Վանի նահանգի մահմեդական ազգաբնակչությունը, որը համակարծիք չէր սկսված պատերազմին եւ նախագգում էր իր պետության քայքայումը եւ չէր տարակուսում, որ Ռուսաստանի հաջողությունը պատերազմում կասկածից վեր էր, անգիտակից ձեւով մնում էր անհոժար եւ շվարած:

Այս իրավիճակում, զորահավաքից 90 օր հետո, Սեւ ծովում տեղի ունեցած նավային միջադեպից եւ Ռուսաստանի հետ դիվանագիտական հարաբերությունները խզելուց հետո, Թուրքիան հռչակեց ջիհադ՝ սրբազան պատերազմ⁷²:

1914թ. նոյեմբերի 11-ին Ստամբուլի սուլթան Մեհմեդ Ֆատիխի մզկիթում, շեյխ-ուլ-իսլամ Հայրի էֆենդին ընթերցեց 5 ֆետվ (հրովարտակ) եւ հռչակեց սունի մահմեդականների ջիհադ՝ «սրբազան պատերազմ Անտանտի դեմ»⁷³:

1914թ. նոյեմբերի 13-ի հատուկ հրովարտակով Անտանտի երկրներին ջիհադ հայտարարեցին նաեւ շիա մահմեդականների բարձրագույն հոգեւոր ներկայացուցիչները⁷⁴:

Մզկիթներում, տներում եւ հասարակական վայրերում, թուրքերի, քրդերի եւ բոլոր խավերի մեջ ծավալվեց պետական եւ մասնավոր քարոզչություն:

Ջիհադին մասնակցելու էին հրավիրվում ինչպես Օսմանյան կայսրության, այնպես էլ տարածաշրջանի այլ մահմեդականները:

Պատերազմի հայտարարությամբ եւ ջիհադի հրապարակումով միանգամից փոխվեց դրությունը Վանում, եւ ինչպես Հ. Կոսոյանն է նկատում՝ «ստեղծուեցաւ քաղաքական աւելի փափուկ, աւելի վտանգաւոր կացութիւն»⁷⁵:

Այն ակներեւաբար, խորթություն եւ թշնամանք հրահրեց մահմեդական

70 Ա-Ռ, նշվ. աշխ., էջ 103:

71 Տնն Ա. Նապան, Հայկական հարցը եւ միջազգային դիվանագիտությունը, Երեւան, 1965, էջ 78:

72 Հ. Կոսոյան, նշվ. աշխ., էջ 11:

73 Տնն Мустафа Кемаль. Путь новой Турции, т. IV, М., 1934, էջ 350:

74 Տնն Է. Փ. Լյուշսեյտ, նշվ. աշխ., էջ 60:

75 Հ. Կոսոյան, նշվ. աշխ., էջ 13:

եւ քրիստոնյա ազգաբնակչության միջեւ: «Մոլեռանդ թուրք ու քուրդ տարրերը, հրահրուած ճիհատով, թոյնով եւ ատելութեամբ լեցուեցան քրիստոնեայ բնակչութեան դէմ, մասնատրապէս հայ տարրերի դէմ»⁷⁶:

Ահա թե ինչ էին պատմում Վանում գորակոչի պատճառով պահակ-ոստիկանության մեջ ծառայություն անցած վանեցիները, որոնք «պատահականորեն ներս կմտնեն Վանի Ուլու ջամ» (կենտրոնական մզկիթ)⁷⁷: «Սովորական շրջագայութիւն կը կատարէինք, առաջնորդութեամբ թուրք տասնապետի մը: Յուրտի եւ յոգնածութեան պատճառաւ ներս մտանք մզկիթը, ուր հոծ բազմութիւն մը կար: Ամենքը երկիւղվածութեամբ կը լսէին քարոզիչը, որ ճիհատի բացատրութիւնը կուտար իր ունկնդիրներուն: Անոր խօսքերէն թոյն եւ արիւն կը կաթէր: «Միսիւման չէ նա եւ անհաւատներէն աւելի վատթար, որ սուր չի վերցներ մեր խալիֆայի սուրբ հրամանի համար, մեր երկիրը քանդող գեաւորներու դէմ: Մեր թշնամիները են այս երկրի մէջ կան են դուրսը, բայց պէտք է ատոր համար ձեր աչքերը լայն բանաք, լաւ խելամուտ ըլլաք կրօնի թշնամիներու բոլոր գործերուն»: Այս միջոցին կարդաց թուղթ մը, որու բովանդակութեան ինչ ըլլալը չհասկցուեցաւ, որովհետեւ աւելի արաբերէնի կը նմանէր: Բայց «միսիւման», «խրիսթիան» եւ «գեաւոր» բառեր ուշադրութեան կը զարնէին: Այդ պահուն մեր տասնապետը հրաւիրեց մեզ մեկնիլ եւ մենք բոլորովին ճնշուած եւ խռովայոյզ հեռացանք: Այն տպաւորութեան տակ ենք, թէ **անոնց այնքան պատերազմը կարծես չի հետաքրքրեր, որքան ներքին հաշիւները մաքրել կ'ուզեն** եւ թուրք ժողովուրդը ատոր կը պատրաստեն»⁷⁸:

Ստեղծվեց «հեղձուցիչ քաղաքական մի մթնոլորտ», «խճճված հարաբերությունների անքակտելի մի հանգույց», որի անմիջական հետեւանքները սկսեց կրել Վասպուրականի հայությունը:

Հետագայում, Վասպուրականի ջարդարարության համար կիրառված մահմեդական մոլեռանդության փորձն օգտագործվեց նաեւ այլ շրջաններում: Մեծ Բրիտանիայի Արտաքին գործերի նախարարության արխիվում ֆրանսահայ նշանավոր պատմաբան Արթուր Բեյլերյանի հայտնաբերած փաստաթղթերից մեկը հաստատում է, որ 1915 թ. հունվարի սկզբին տեղի ունեցած իթթիհատի գաղտնի ժողովի կողմից ընդունված «10 հրահանգ»-ներից 3-րդում նշվում էր, որ անհրաժեշտ է «գրգռել մահմեդական հասարակությանն այն մեթոդներով, որոնք կիրառվել են այնպիսի նահանգներում, ինչպես Վանը, Էրզրումը կամ Ադանան, որտեղ հայերը իրենց դէմ հարուցեցին մահմեդականների ատելությունը, եւ առաջ բերել կազմակերպված ջարդ...»⁷⁹:

76 Անդ, էջ 11:

77 Նախկինում այն եղել է Վանի Ս. Միոն Գազկաշեն տաճարը:

78 Հ. Կոստյան, նշվ. աշխ., էջ 11-12: Ընդգծ.՝ Ա. Հ.

79 Մեծ տերությունները, Օսմանյան կայսրությունը եւ հայերը ֆրանսիական արխիվներում (1914-1918), հատոր I, աշխատասիրությամբ Արթուր Պեյլերյանի, առաջաբանը՝ Ժան-Բատիստ Դյուրոզելի, ֆրանսերենից թարգմ. Վարուժան Պողոսյանը, Երևան, 2005, էջ XXIX-XXX: